

Terrain cun relaziuns difficilas

La renomnada Bouda blaua

DAD ANNATINA FILLI/FMR

■ Fingia da l'on 1888 vaiva ün auazun procurà per dons vi da la via pro la Bouda blaua in vicinanza da Scuol. Actualmaing sun perits chi evaluatechan progets per sgürar la costa da la bouda. Ün di avant Nadal d'eira ella rivada giò sün via: La Bouda blaua. Quist lö as rechatta pac toc dadour Scuol, in vicinanza da l'Hotel Kurhaus. La bouda d'eira uschè gronda cha la via chantunala tanter Scuol ed Ardez ha stuvü gnir serrada per trais eivnas. Il trafic es gnü svià sur Ftan e tras il cumün d'Ardez. La bouda ha pesserà fingià plü bod per qualche lingias illas gazetatas, tanter oter l's ons 1891, 1911 e 1931.

Stüdis in elavuraziun

Grischa e naira, uschè s'ha preschantada la Bouda blaua dals 23 december da l'on passà. Sün üna lunghezza da 30 meters ha'la cuvernà la via chantunala. Sün ün'otezza da 20 meters as vaivan davostachats 500 meters cubic grippa. Davo cha geologs vaivan examinà il lö s'haja fat gnir giò amo passa 1000 meters cubic crappa e terra.

Infra trais eivnas s'haja rumi la bouda e dat liber ün vial. «Actualmaing sun perits vi da l'examinar progets per üna soluziun definitiva», declera *Jachen Kienz*, il manader da l'Uffizi chantunala da construcziun bassa (UCB) dal district quarter. Co cha'l lö da la bouda a Nairs gnrà



Cuort avant Nadal ha cuvernà la Bouda blaua la via chantunala in vicinanza da Scuol.

FOTO UCR

sgürà nun es amo cuntschaint. «Intant es la costa sgürada provisoricamaing cun raits», manzuna *Jachen Kienz* da l'Uffizi chantunala.

Las lavurs definitivs pro la Bouda blaua sun previssas per quista prümavaira e düraran fin aint per la stà. Fin quella jada vain reglè il trafic cun l'agüd d'amplas da trafic.

Serradas da fin duos mais

Da l'on 1888 vaiva ün auazun devastà la via tanter Ardez e Scuol in divers lö. Gronds dons vaiva dat pro l'uschenomnà Stutz suot Ardez e pro la Bouda blaua. Tenor il «Fögl d'Engiadina» dals 20 gün 1891 ha stuvü gnir serrada la via per passa duos mais, quai pervi d'ün sbassamaint dal trajet. In l'ediziun dals 30 de-

ember 1911 esa tanter oter scrit pro Scuol il seguaint: «Per reparatura del stradun nella 'Bouda blaua' survain il cumün ün subsidi chantunala nel import da 50 pertschient dels cuosts.» Quista indemnisaziun es gnüda adgüidichada al cumün da Scuol tenor la ledscha chantunala dal mantegnimaint da vias chi d'eira entrada in vigur da l'on 1888.

Üna bouda renomnada

20 ons plü tard, in marz da l'on 1931 han ils lecturs dal «Supplemaint al Fögl d'Engiadina» pudü leger tanter oter la seguainta novità: «In sanda davomezdi gnit giò la renomnada 'Bouda blaua', be dadour il 'Kurhaus' Nairs.» Precs in quist lö d'eira previs per quella prümavaira lavurs da sgürezza e da realisar üna gallaria in beton armà. «La bouda volet allura propi demonstrar l'urgenza della reparatura e gnit giò cun üna massa da material.» Quella jada d'eira cuvernada la via sün üna lunghezza da var 40 meters e la massa d'eira gnüda calculada dals perits sün 800 meters cubic. «Intant as tratta d'allontanar duos cornas da grip chi imnatschan da gnir e chi periclitescan ils lavuraints.» Il material da la bouda d'eira passà tanter duos stangas da telefon e vaiva sepulì üna latta dal condot electric tanter il Kurhaus e la chasa d'economia. Als 31 da marz da listess on d'eira scrit il «Fögl d'Engiadina» il seguaint: «La chara e custavla bouda blaua a Nairs dà a las gazetatas eir avuonda da discuorrer e nos lo-daveil departamaint da fabrica chantunala tschüffa magari vi alch spundschigliada per las costas aint. Nu savess, scha cun radschun o brich, ma tant ais tschert, cha sarà greiv da far alch da taglia in quel lö da relaziuns da terrain difficilas.» L'intent da quel temp d'eira da realisar üna gallaria. Tenor l'opiniun dal redactor faiva dabsögn da reparar il trajet sistematicamaing per «cha la bella culur, saj'la blaua o cotschna, nu's transmüdarà forsa amo plüssas jadas in trid grisch e nair».

Chaltschina dess gnir üttilisada plü suvent

La visiun d'ün center cun chalchera e cuors

DA FLURIN ANDRY/FMR

■ I's ultims ons ha la tecnica veglia dad arder chaltschina gnü in Engiadina Bassa ün renaschimaint. Ün specialist per quista tecnica es **Joannes Wetzel** chi vaiva survgni dal 2015 il Premio Calcio. L'impuls da tour in funcziun in Engiadina Bassa chalcheras ed arder chaltschina sco chi gniva fat fingià avant blers tschientiners vaiva dat da l'on 2014 il tschientavel giubileum dal Parc Naziunal Svizzer. A chaschun da quel anniversari vaiva il cumün da Scuol decis da tour in funcziun la chalchera in S-charl. In quella d'eira gnü ars chaltschina l'ultima jada da l'on 1934 per far o renovar las alps in Val S-charl. Ils lavuraints da cumün vaivan manà nanpro 30 tonnas crap da chaltschina, dimena dolomit. Il müdrer *Joannes Wetzel* chi s'ha specialisà sün rebocadüras tradiziunals e sgrafits

ha ars la chaltschina e muossà als interessats co cha quai vain fat. Our da las 30 tonnas vaiva'l ars 13 tonnas chaltschina. Causa la stà in S-charl suot l'insaina da la chaltschina es nat a Nairs ün nouv proget.

Cuntinuaziun illa chalchera a Sur En

Ils respunsabels dal Center da cultura ed art contemporana Nairs cul directur *Christof Rösch* han decis da cuntinuar ad arder chaltschina. Cul sustegn dal cumün da Scuol ed insembel cun Wetzel hana restaurà da l'on 2017 üna chalchera veglia a Sur En da Sent. «L'interess pels cuors ch'el ha lura dat là es stat grond», disch l'architecta *Delphine Schmid*. Insembel cun Wetzel e Rösch ha ella fundà al principi da l'on la società «kalkwerk». Sco quart commember fa part da quella *Philipp Kuntze*. El es manader da gestiun dal center da cuors Ballenberg. «Nossa

visiun cul kalkwerk/chalchera es da s-chaffir ün center da cumpetenza per intermediar il savair davart la chaltschina e per demonstrar co cha quella vain arsa», declera Schmid, «nos böt es da promoviver uschea cha la chaltschina gnia üttilisada darcheu plü suvent pro'l fabricar.»

Inspiraziun eir per otras regiuns

Delphine Schmid manzuna ils avantags da la chaltschina: «Chaltschina arsa serva sco üna sort colla per far molta, rebocadüras e culuors. Ella es ecologica e reciclabla, serva per far reparaturas vi da mürs e fatschadas, regulescha l'umidità, frena la müffa ed oter plü.» Quista materia es gnüda s-chatschada adüna dapli da prodots s-chaffits da maniera industrial. Sco cha l'architecta accentuescha es il savair davart l'adöver da chaltschina pel fabricar perquai periclità da crodar in invlidanza. «Causa chi dà adüna dapli»

umans chi s'interessan per fabricar da maniera perdürabla eschna persvas cha nos proget haja grond potenzial. Forsa ch'otras regiuns as laschan inspirar da nos proget.»

Cun 15 tonnas crappa

Quista stà als prüms avuost piglia Wetzel darcheu in funcziun la chalchera a Sur En. Dürant bundant ün mais gnaran ramassadas 15 tonnas crappa cun chaltschina per tilla arder in quella. La chaltschina arsa gnarà depositada in butschins serrats da maniera ermetica ed üttilisada illa regiun per lavuors cun chaltschina. «Per finanzia il proget cull'arsa da chaltschina 2020 a Sur En faina adöver da la metoda dal crowdfunding», conclüda l'architecta Schmid.

Ulteriuras infuormaziuns as chatta i'l internet: www.kalkwerk.ch



Il fö illa chalchera a Sur En vain impizzà ingon als prüms avuost.

FOTO J. WETZEL



Arsa da chaltschina da not d'ürant l'on 2017.

FOTO CHR. STAHEL

SAMEDAN

Scoula professiunala vain sanada

(fmr/fa) La chasa da scoula da la scoula professiunala a Promulins es gnüda fabricada l's ons 1979/1980. Renovaziuns fundamentalas e sanaziuns nun haja dat i'l fratemp ingünas.

Differentas parts da la chasa da la scoula professiunala stessan gnir rimplazzadas. In vista al bsögn d'üna sanaziun da la chasa da scoula ha la supranza da Samedan laschà analizar il stadi actual da quella. Il concept pella sanaziun ha inoltrà la supranza a l'Uffizi chantunala pella fuormaziun professiunala. Üna prüma stima dals cuosts approximativs fa quint pella sanaziun cumpleta cun cuosts da 10 fin 12 miliuns francs. Cul proget esa previs da cumanzar da prümavaira 2021.

La via da Punt Muragl sü Muottas Muragl vain üttilisada per adovers turistics, forestals e per l'economia alpestra. Partits invouts sun uschea l'Engadin St. Moritz Mountains AG, la cumünanza d'alp e chascharia, l'uffizi forestal da Punttraschigna/Samedan e'l cumün da Samedan.

Üna cunvegna tanter il cumün e la teleferica dess reglar chi chid' es respunsabel pel mantegnimaint da qual toc da la via. A l'avis da la supranza cumünala da Samedan es ün scumond da fös artificials d'ürant tuot l'on, eir a Silvester ed als prüms avuost, exagerà. Ils disturbis cha quists fös chaschunan d'ürant be duos dis l'on sun tenor ella supportabels.

Essas Vus gia commember?

Procap Grischun
Hartbertstrasse 10, 7000 Cuir
Tel. 081 253 07 07, PC 70-7755-0
www.procapgrischun.ch

per presonas cun handicap

procap grischun